

TIANARA PIRITI.

I te mea kua nui rawa nga whakahuatanga i te ingoa o Tianara Piriti i roto i Te Pipiwharaura, e kore e maha a matou kupu mo tenei tangata rongonui i enei ra. He Aihiri a Tianara Piriti, ka 48 ona tau. No te whawhai tonu ki te Poa ka tu ia hei tianara, a e kiia ana ko ia te tino apihare hoiho o te ope katoa a te Kuini i te ao. Koia te kopere a Rapata hei re-re haere i tona aroaro hei whakahaehae i te hoa riri. Na tenei tangata hoki i tuatahi te arahi i nga tama a Niu Tireni ki te pakanga, naana ratou i whakaako, a inaanei kua paku to ratou rongoa toa ki nga wahi katoa.



TE HAHU MOMONA.

Kua tae mai ki a matou te pukapuka a Himiona te Kani, o Uawa, "tino kai-whaka-haere o te Hahi Momona, he tumuaki hoki," he whakahe naana mo nga kupu i whakapuakina e te Pihopa o Waiapu i te hui o te Hahi i tu ki Wharekahika, ara mo enei kupu na: "No muri mai ka puta ko te Momona, e whakapeau ke nei i nga kupu o te Karaipiture hei tuara mo nga korero tito a tona poropiti." He tono ano hoki ta Himiona te Kani kia whakaaturia e te Pihopa nga he o te Hahi Momona, a mehemea ki te marauna nga he ki a ia ka puta ia ki waho o tana Hahi, me etahi atu. E kore matou e ahei te ta katoa i te reta a Himiona, he tino whakalihiri rawa no etahi o ana kupu. I mea ia ki te kore te Pihopa e whakaatu i nga he o te Momona, "he maumau korero me kopani to arero ki roto ki to mangai." He kupu taikaha rawa enei ki a matou whakaaro, a e tino mohio ana matou e kore e hapa te riri o te iwi ki tenei tuaro ki nga kaumatua. To te Momona tona tuaro, to "te hunga tapu o nga ra o muri nei!" E toa Himiona, kaore koe i te mohio na te kaumatua nei ratou ko ona matua i koroki ai to mangai koikoi i enei ra? Kia ata niau i te oha a nga pakeke. He tangata whakaputa koe i nga Karaipiture, kaati ra tirohia e koe, Mahi xxiii. 5.

E kore matou e whakahe ki te kukume i te

Pihopa ki roto ki nga mahi tautohetohe penei engari ma matou i oia e whakarite te hiahia o Himiona te Kani. He maha nga he o te Hahi Momona, he he tino taumaha rawa, he he e kore ai taua hahi e ahei te kiia he Hahi Karaitiana. Ahakoa tika noa etahi o nga whakaakoranga a te Momona, otira ko te kaupapa e pirau ana.

E mea ana nga pukapuka o nga whakaakoranga a te Momona:

1. He tangata te Atua i te timatanga; he wahine hoki ta te Atua, a ko raua nga matua o etahi atu atua. E whakarite ana tenei whakaakoranga i te Atua ki te tangata, a he take nui tenei e kore ai e ahei te ki i te Hahi Momona he Hahi karaitiana.

2. E mea ana tetahi o ana pukapuka he Atua a Arama, me te Karaiti he tangata penei me taton nei tona timatanga. ("Tirohia "Doctrines and Covenants," na Hohepa Mete; me te "Millennial Star.")

3. E mea ana i roto i tetahi o nga tino pukapuka a te Momona ("The Seer") mehemea i tuhihia katoatia nga korero mo te Karaiti, tera e kitea he wahine mana a Meri, a Mata, a Meri Makarini. Tetahi kohukohu kino rawa!

4. Kei te matou te katoa ki ta Hohepa Mete i whakaako ai mo te marauna, kia tokomaha nga wahine ma te tangata kotahi. Tera ke ta te Karaiti, "I te orokohanganga i hanga raua e te Atua, he tane, he wahine. Mo konei ka mahue i te tangata tona papa me tona whaea, a ka piri ki tana wahine; hei kikokiko kotahi raua tokorua." (Maka x. 6-8.) Tokorua tonu ki a ia, ko te tane, ko te wahine. Ko ta Paora hoki i rite ki tenei, "Kia rite ma te tane ko tana wahine ake; ma te wahine ano ko tana tane ake." (1 Korin. vii. 2.) Tena ki te rua tekau nga wahine a te tangata, na tehea o te rua tekau te tane, e kiia ai ko "tana ake?"

Koia nei ra, e ta Himiona, etahi take he o to hahi, tera atu ano etahi; engari e kore e whakapaua ki konei i te apiapi rawa. Katabi ano pea koe ka rongoa ki enei o nga whakaakoranga a to hahi, otira kua rongoa atu koe mo te moe ngahuru i te wahine. Mau e ui atu ki o pakeha mehemea e ahei ratou ki te whakakahore i a matou kupu. Ki ta matou whakaaro he tika tonu te whakaako a te Pihopa i te Hahi kia tupato i te hahi o tangata nei o Hohepa Mete.

Na te Etita o TE PIPIWHARAUAO.